

3

Тазалықтан
басталған
жаңғыру

6

Татамидегі
табандылықЖАҢАРУ ҮШІН
ДАУЫС БЕР!ҚҰРЫЛТАЙ
23 тамыз
августаГОЛОСУЙ
ЗА ОБНОВЛЕНИЕ!

Сыр бойы

№120-121 (21195-21196) 15 тамыз, сенбі 2026 жыл

Қызылорда облыстық қоғамдық-саяси газет. 1929 жылдың 1 шілдесінен шығады

www.election.gov.kz

/// САУДА МӘДЕНИЕТИ

ЖАЙМА БАЗАРДАН – ЖАҢА ҒИМАРАТҚА

Қызылорда қаласындағы ашық сауда орындары жыл соңына дейін жаңа орынға көшеді. Қазір шаһардағы базарларда құрылыс қарқынды жүріп жатыр. Нақтырақ айтқанда, «Сыбаға», «Асбол» және «Талғат» базарларының аумағында еңселі сауда орындары бой көтеруде. Біз жұрт арасында «Ескі» және «Жаңа базар» деп аталатын аумақтағы жұмыстарды көзбен көрдік. Базар иелерімен сөйлесіп, кәсіпкерлердің де пікірін аңдаған едік.



Қала әкімдігі берген мәліметке жүгінсек, бүгінде облыста бекітілген жол картасына сәйкес, қала аумағында орналасқан әмбебап сауда базарларын жаңғырту және заманауи сауда форматына көшіру жыл соңына дейін жоспарланған.

– Айталық, «Сұлтан-2» базарының құрылысы биыл ақпан айында толық аяқталып, іске қосылды. Жобаның құны 800 млн теңгеге жуықтайды. Қазір халыққа қызметін ұсынуда. Жалпы базардың төменгі бөлігі көкөністерге, бірінші қабаты азық-түлікке арналса, екінші қабаты киім-кешек және тұрмыстық заттар сататын орындарға бөлінген. Бұған сатушылардың 80 пайызы орналасты, – дейді қалалық кәсіпкерлік және өнеркәсіп бөлімінің басшысы Мұхтар Жетілгенов.

2-бет

/// РУХАНИЯТ

ЖАҢА МЕШІТ БОЙ КӨТЕРДІ



Қаланың шығыс жақ беткейін алып жатқан Тасбөгет көрінде көркейту, абаттандыру жұмыстары қарқынды жүргізілуде. Елді мекендегі ең басты мәселе, қалааралық жолдың және ішкі көшелердің сапасын жақсарту мақсатында өткен жылдан басталған құрылыс жұмыстары қазір аяқталуға таяу.

Тасбөгет елді мекенінің халқы үшін тағы бір айтулы жаңалық, кент оралығынан сәулеті келіскен жаңа мешіт бой көтерді. Иман-дылық үйінің ашылуына алыс-жақыннан келген меймандар, зиялы қауым өкілдері, сондай-ақ қарапайым тұрғындар жиналды. Әуелі Құран кәрім аяттарын оқумен бастау алған жиын ел ағаларының, қадірлі қоғамдастық жаксы тілегімен жалғасты.

Жиынға қатысқан облыстық мәслихат төрағасы Мұрат Тлеубетов жаңа мешіттің ашылуына құттықтау лебізін жеткізді.

Рухани танымдық бағытта қызмет көрсететін сәулетті нысан салып, қала ішінің көркейіп, абаттануына, сондай-ақ тұрғындарға қолайлы жағдай жасауға қолдау көрсеткен Қазақстанның Еңбек Ері Абзал Ерәлиевке алғыс білдірді.

Жиынға арнайы шақырылған Қазақстан мұсылмандар діни басқармасының төрағасы, Бас мүфти Наурызбай қажы Тағанұлы иман-

дылықтың игі шарттары туралы айта келіп, елді біріктіретін елеулі іске бастамашы болған азаматтарға ризашылығын жеткізді.

Облыстық ардагерлер кеңесінің төрағасы Серік Дүйсенбаев, Денсаулық сақтау ісінің үздігі Тұрғанбай Маханов сынды ел ағалары сөз сөйлеп, бата берді. Қазақстанның Еңбек Ері, «Құрмет», «Отан» ордендерінің иегері Абзал Жұмашұлы жиынға қатысқан ағайынға алғыс білдірді.

Жаңа мешіт ғимаратының жалпы аумағы 946,72 шаршы метр. Құлшылық үйі бір мезетте 700 адамға дейін қабылдай алады. Мешіт құрылысы 2022 жылы жеке кәсіпкер Абзал Ерәлиевтің демеушілігімен басталған.

Айта кетейік, бүгінде Қызылорда облысында 195 мешіт халыққа қызмет көрсетеді. Оның 24-і облыс орталығында орналасқан. «Ербатыр ата» мешіті – Қызылорда қаласындағы 25-ші құлшылық үйі.

«СБ» ақпарат



Суреттер: mufiyat.kz

/// 16 ТАМЫЗ – СПОРТ КҮНІ

СЫР СПОРТЫ: СЕРПІН, СЕНІМ, ЖЕҢІС

Спорт – жарыс алаңындағы бәсеке мен жеңіс тұғырындағы медаль ғана емес. Ол – ұлт саулығының тірегі, жас ұрпақтың жігерін жылып, мінезін шындайтын үлкен мектеп. Мемлекет басшысының «Спортты насихаттау, оны әсіресе балалар мен жасөспірімдер арасында дәріптеу – ұлт саулығының көпірі» деген сөзі де осы бағыттағы жұмыстың мәнін айқындай түседі. Бүгінде Сыр өңірінде бұқаралық спорттан бастап жоғары жетістіктер спортына дейінгі тұтас жүйені дамытуға басымдық беріліп, соның нәтижесі жаңа нысандардан да, ел намысын қорғаған спортшылардың жеңісінен де анық көрініп отыр.



Коллаж: Қуаныш Омарбаев

Туған жердің намысын арқап жарыс жолына шыққан спортшы үшін әр медальдың салмағы бөлек. Оның артында жылдар бойғы еңбек, таңғы жаттығу, жаракат пен жеңілісті еңсерген қайсарлық жатыр. Ал сондай спортшыны тәрбиелеу үшін талапты бапкермен бірге сапалы база, тұрақты қолдау мен үлкен спортқа бастайтын жүйе қажет. Кейінгі жылдары облыста дәл осы бағытта атқарылған жұмыстар Сыр спорттың тынысын кеңейтіп, жаңа белеске бастады.

Нақты кезеңде облыста 1,5 мыңнан астам спорт нысаны жұмыс істейді.

Оның 900-ден астамы ауылдық елді мекендерде орналасқан.

Бұл – спорттың қаладағы ірі кешендермен ғана шектелмей, ауыл баласына да жақындай түскенінің айғағы. Кейінгі кезеңде өңірде жиырмадан астам жаңа спорт нысаны салынып, ел игілігіне берілді. Осы жылдың өзінде «Ауыл – ел бесігі» бағдарламасы аясында Шияға, Бекарыстан би, Келінтөбе және Қожабақы ауылдарында жаңа спорт кешендері ашылып, қолданысқа берілді. Алдағы уақытта Әйтеке би кентінде де жаңа нысанды пайдалануға беру жоспарланып отыр.

6-бет

Валюта бағамы

\$ 465,19 kzt

€ 536,55 kzt

₽ 5,61 kzt

Ауа райы:

Сенбі



+37°



+24°

Жексенбі



+33°



+21°

/// ОБЛЫС ӘКІМДІГІНДЕ

ҚОҒАМДЫҚ ТҰРАҚТЫЛЫҚ МАҢЫЗЫ

Тәуелсіздіктің алғашқы жылдарында өңірде 14 мешіт болса, бүгінде олардың саны 195-ке жеткен. Облыста 6 мешіттің құрылысы жүргізілуде. Олардың үшеуі бір мезетте 1000-ға жуық адамды қабылдай алады.

Кәсіпкерлердің демеушілігімен бой көтеріп, ресми түрде ашылған Тасбөгет кентіндегі мешіт те осы қатарда. Сонымен бірге Арал мен Байқоңыр қалаларында салынып жатқан екі ғибадат үйі де жуық арада ел игілігіне берілімек.

Кеше облыс әкімі Мұрат Ергешбаев Қазақстан мұсылмандары діни басқармасының төрағасы, Бас мүфти Наурызбай қажы Тағанұлын қабылдауда қоғамдық тұрақтылықты сақтау және діни ахуалды одан әрі жақсарту бағытында атқарылып жатқан жұмыстар талқыланды.

— Бүгінде әкімдік пен құқық қорғау органдарының қызметкерлері «Заң мен тәртіп» қағидаты аясында қала, аудан және шалғай елді мекендердегі тұрғындар арасында түсіндіру жұмыстарын тұрақты жүргізеді. Жат ағымдардың алдын алу және олармен күресуде тиісті шаралар ұйымдастырады. Бұл жұмыстарды одан әрі жандандыруда қолдауларыңыздың маңызы зор.



Суретті түсірген: Бағдат ЕСЖАНОВ

Екі тараптың бірлескен оң бастамалары қоғамдық тұрақтылықты нығайтып, егемен еліміздің бірлігі мен тұтастығын сақтауға негіз болады деп сенемін, — деді аймақ басшысы.

Өз кезегінде Бас мүфти діни тұрақтылықты сақтаудағы жұмыстарға оң баға беріп, бірлескен бастамалар үшін ризашылығын білдірді.

«СБ» ақпарат

ЕҢБЕК АДАМЫНА ҚҰРМЕТ ЕРЕКШЕ

Қазалы өңірінде ғана емес көрші аудандардағы құрылыс жұмыстарында да қолтаңбасын қалдырып келе жатқан, көптеген көрікті нысандардың бой көтеріп, туған жердің өсіп-өркендеуіне өзіндік үлесін қосып жүрген құрылыс мекемелерінің қатарында осыдан ширек ғасыр бұрын шаңырақ көтерген «Намыс-Құрылыс» жауапкершілігі шектеулі серіктестігін айтуға болады.

1993 жылы Әйтеке би кентінде өмірге келген Елеубай Ержан Маратұлының 2011 жылы Қазалы көлік-техникалық колледжінен алып шыққан мамандығы теміржол құрамаларына эксплуатациялық-техникалық қызмет көрсету және қосымша электр жабдықтарын жөндейтін слесарь-электрик болса да, 2017 жылдан бері осы «Намыс-Құрылыс» мекемесінде табан аудармай өзі таңдаған құрылыс саласында еңбек етіп келеді екен. Өзі де қолынан іс келетін жігіт еді, таңдаған мамандығы да соған сай келіп, іздегенге сұраған дегендей, құрылыс нысандарының ішкі-сыртқы электр жүйелері, сан-техникалық, жылу жүйелерінің нағыз зәру тұстарында керекке жарап жатқаны көңілінен шығып, осы мекемеде тұрақтап қалған. Аудан көлемінде де, өзге өңірлердегі іссапарда да Ержан өзінің бесаспап маман екенін осы жылдар ішінде сеніп

тапсырылған шаруаның үлесінен шығып, дәлелдеп үлгерді.

— Құрылыс саласы болғасын, жұмыс талғамаймыз. Іргетас құю, кірпіш, ракушка өру, ағаштан есік-терезе, пластик материалдан есік, терезенің түрлері, жылу жүйелері, брусчатка, кафель төсеу, құрылыс нысанының іші-сыртын, шатырына дейін түгел жабдықтап, дайын күйінде иесіне тапсыру тікелей міндетіміз. Құрылыстағы басты талап — сапа мен мерзім. Мұны мердігер мекемелер қатаң сақтайды. Өйткені қолға алынған жұмыстың ертенгі нәтижесі халықтың тұрмыс сапасын жақсартуға, сол жұмысты міндетіне алып атқарып шыққан құрылысшылардың жауапкершілігіне тікелей байланысты. Сондықтан өзімізге сеніп тапсырылған жұмыстың мінсіз орындалуына бар күш-жігерімізді жұмсауға тырысамыз, — дейді жас та болса өз ісін жетік меңгерген Ержан Елеубай.



Құрылыс саласындағы мінсіз қызметі үшін екі мәрте «Намыс-Құрылыс» ЖШС басшысының, екі мәрте Қазалы ауданы әкімінің Алғыс хатын иеленсе, 2025 жылы өңірдің абыройын арттыруға қосқан үлесі үшін Қызылорда облысы әкімінің Алғыс хатымен марапатталды.

Жолдасы Айсұлу кәсіпкер, ұлы мен қызы мектеп жасында. Ержан Маратұлы адал еңбегінің нәтижесінде әріптестерінің құрметіне бөленген, жұмысына жауапкершілікпен қарайтын, қандай тапсырма берілсе де аманат деп қабылдайтын, еңбеккор, замандастарына үлгі етуге тұратын азамат.

Әлімжан ҚИЯС.
Қазалы ауданы

ЖОБА

Қызылорда облысында халықты сауда алаңымен қамтамасыз етудің ең төменгі нормативтерін бекіту туралы

«Сауда қызметін реттеу туралы» 2004 жылғы 12 сәуірдегі Қазақстан Республикасы Заңының 8, 14-1, 14-2 баптарына, «Ішкі сауда қағидаларын бекіту туралы» Қазақстан Республикасы Ұлттық экономика министрінің міндетін атқарушының 2015 жылғы 27 наурыздағы № 264 бұйрығына (Нормативтік құқықтық актілерді мемлекеттік тіркеу тізілімінде № 11148 болып тіркелген) сәйкес Қызылорда облысының әкімдігі **ҚАУЛЫ ЕТЕДІ**:

- Қызылорда облысында 1 мың адамға шаққанда 801,4 шаршы метр есебінен халықты сауда алаңымен қамтамасыз етудің ең төменгі нормативтері бекітілсін.
- Осы қаулының орындалуын бақылау Қызылорда облысы әкімінің жетекшілік ететін орынбасарына жүктелсін.
- Осы қаулы оның алғашқы ресми жарияланған күнінен кейін күнтізбелік он күн өткен соң қолданысқа енгізіледі.

Қызылорда облысының әкімі **М.Ергешбаев**



ШАҢАР ШЫРАЙЫН АШҚАН ЖОЛ

Сағымбаев көшесінің «Қызылорда-Құмкөл» автожолына дейінгі бөлігі қайта жаңғыртылуда. Жоба аясында ұзындығы екі шақырымнан асатын жол төрт жолаққа дейін кеңейтілді.

Сонымен қатар, бағдаршамдар мен жарықтандыру бағаналары, аялдамалар орнатылып, жаяу жүргіншілерге арналған жол салынуда. Құрылыс жұмыстарын «Қыран» ЖШС жүргізуде.

АРАЛ АСПАНЫН ӘУЕН ТЕРБЕДІ

12 тамыз — Халықаралық жастар күніне орай ашық аспан астында «OPEN AIR» мерекелік гала-концерті өтті.

Кеште ауданның жас әншілері, бишілері, ақындары мен жайдарманшылары өнер көрсетіп, спорт, мәдениет және шығармашылық салаларында жетістікке жеткен жастардың табыстары таныстырылды. Шараға аудан әкімі Аманжол Онғарбаев қатысып, мерекемен құттықтап, жастарды марапаттады.

ҚОЛДАУДАН ҚАНАТТАНҒАН КӘСІП

Аудан әкімі Алмасбек Есмаханов «Ауыл аманаты» жобасы аясында кәсібін дамытып отырған бірқатар кәсіпкердің жұмысымен танысты.

Ауданда шұбат өндіру, тігін, кондитерлік өнімдер шығару, темір бұйымдарын жасау және мал шаруашылығы бағытындағы жобалар жүзеге асырылуда.

Қарашенгел ауылында 5,3 млн теңге жеңілдетілген несие алған кәсіпкер наубайхана ашса, Жанқожа батыр ауылындағы шаруашылық 20 млн теңгеге 40 бас асылтұқымды казактың ақбас сиырын сатып алған.

АЗИЯ ТӨРІНДЕ ҚОС КҮМІС

Ташкент қаласында өтіп жатқан ауыр атлетикадан Азия чемпионатында аудан спортшылары жүлдегер атанды.

60 келі салмақта Қойшыбек Мұхамедәлі, Ерасыл Саулебеков (85 кг) жүлде иеленді. Қос спортшы ел қоржынына екі күміс медаль салды.

ЖАСТАРМЕН КЕЗДЕСУ

Халықаралық жастар күніне орай аудан әкімі Ардақ Ибраимов белсенді жастармен еркін форматта кездесті.

Басқосуда өңірдегі жастар саясаты, білім алу, еңбек ету, кәсіп бастау және жас буынның бастамаларын қолдау бағытындағы жұмыстар сөз болды. Аудан басшысы жастардың ұсыныс-пікірлерін тыңдап, сауалдарына жауап берді.

ЕКІ АУЫЛҒА ОРТАҚ ҚАУІПСІЗДІК ҚАЛҚАНЫ

Бесарық ауылында төтенше жағдайларға жедел әрекет етуге арналған «Ауыл құтқарушылары» ерікті өртке қарсы құралымының жаңа бекеті ашылды.

Нысан Бесарық және Қоғалыкөл ауылдарына қызмет көрсетіп, өрт қауіпсіздігін күшейтуге мүмкіндік береді.

Жергілікті кәсіпкер «Абай Дәулет» ЖШС-нің қолдауымен салынған бекет арнайы техникаға арналған бокс, диспетчерлік және қызметтік бөлмелермен жабдықталған.

КЕНТ КЕЛБЕТІН КӨРКЕЙТКЕН ЖОЛ

Кент көшелерін жаңғырту және жаяу жүргіншілер жолдарын салу жұмыстары қарқынды жүргізілуде. Жалпы құны 1 млрд 520 млн теңгені құрайтын жоба аясында 4 шақырым автомобиль жолы жаңартылады.

Оның ішінде Яссауи көшесі төрт жолақты болып қайта жаңғыртылмақ. Жоба толық аяқталғаннан кейін жолдың жүріс бөлігі абаттандырылып, заманауи аялдамалар орнатылады.

«КӨГІЛДІР ОТЫН» — АУЫЛ ИГІЛІГІНЕ

Сырдария өзені бойындағы 8 елді мекенді табиғи газбен қамту жұмыстары жүргізілуде. Жоба аясында Қожакент, Өзгент, Ақсуат, М.Нәлібаев, Жаңарық, Қырқеңсе, Байкөңге және Білібай ауылдарына газ құбыры тартылады.

Жалпы құны 5,1 млрд теңгені құрайтын жоба 2026-2027 жылдары жүзеге асырылады. Биыл 27 шақырым газ құбырын жүргізу жоспарланып, қазіргі таңда 8 шақырым аумақта жер қазылып, 3,5 шақырым құбыр төселді.

Дайындаған Бағлан АМАНЖОЛ,
«Сыр бойы»

ЖАЙМА БАЗАРДАН — ЖАҢА ҒИМАРАТҚА



Сондай-ақ «Сыбаға» базары бойынша құрылыс жүргізілетін жер учаскесіне орнықтыру актісі алынып, арнайы лабораториялық зерттеу өткен. Қазір құрылыс алаңында іргетас қаланып, төменгі бөлігіне колонналар құйылып жатыр. Құрылысқа қажетті арнайы скважина да қазылып, электр жүйелері тартылған. Мұнда орналасатын ғимарат екі қабаттан тұрады. Жұмысты толық бітіру жыл аяғына белгіленіп отыр.

Ел аузында «Жаңа базар» аталатын аумақтың ашық сауда орындары бұрын қатар-

ласа орналасқан контейнерлерде болды. Енді мұнда екі қабатты, 12 мың шаршы метрлік ғимарат құрылысы басталып кеткен.

— «Жаңа базар» аумағындағы екі жабық сауда орны — «Атамекен» мен «Жаңа базар» ғимараты 2012-2013 жылы пайдалануға берілген. Енді осындағы «Асбөл» базарын да жыл соңына дейін аяқтаймыз. Қазір құрылыс тоқтаған жоқ, негізгі қабаттардың колонналары мен ригельдері құйылып, плиталары орналастырылуда. Қосымша кірпіш қалау және газоблок өру басталды. Ал негізгі

жобаның құны — 2,8 млрд теңге, — дейді «Асбөл» базары директорының орынбасары Абылай Жұматаев.

Оның айтуынша, ашық базардың орны босаған соң түгелдей автотұраққа айналады. Қазір аталған базар басшылығымен 500-ден аса кәсіпкер келісімшартпен жұмыс істейді.

Ал «Ескі базар» аумағындағы «Талғат» ашық базары орнында үш қабатты нысан толық тұрғызылып, ішкі әрлеу жұмыстары басталып кеткен. Ғимараттың сыртқы келбеті де қапталып жатыр. Қазір 800 млн теңге көлемінде қаржы жұмсалған. Қазан айында аяқталатын құрылыстың негізгі құны — 1,5 млрд теңге. Сауда ғимаратының директоры Алмат Мерекөвтің үйлестіруімен бұрын осы жерде сауда жасаған кәсіпкерлерге уақытша орын да қарастырылыпты.

— 18 жылдан бері ашық базарда сауда істедім. Қыстың қақаған аязы, жаздың аптап ыстығын мен айтпай-ақ білесіз. Бүгінгі базар иесі бізді уақытша орынға жайғастырып, кәсібімізді тоқтатпауға күш салып отыр. Бұйырса, күзде жаңа ғимарат бітсе, сонда орналасамыз. Кәсіпкерлердің де, келушілердің де жарық, жазда салқын, қыста жылы, бар жағдайы қарастырылған жабық сауда орнында жүргені жақсы емес пе? — дейді кәсіпкер Рая Қуантаева.

Айта кетейік, Үкімет тапсырмасымен Ұлттық даму жоспарына сай 2029 жылға дейінгі заманауи сауда форматының үлесін 70%-ға жеткізу жоспарланған. Қазір Сырдың бас шаһарындағы сауда базарларын жаңғырту аясында 5,8 млрд теңге инвестиция тарту көзделіпті. Жалпы мұндай құрылыс бекітілген Жол картаға сәйкес жүзеге асырыла береді.

Ержан ҚОЖАС,
«Сыр бойы»,
Фото: Н.НҮРЖАУБАЙ



Президент Қасым-Жомарт Тоқаевтың бастамасымен жүзеге асырылып жатқан «Таза Қазақстан» жалпыұлттық экологиялық бағдарламасы елді мекендерді көркейту мен қоршаған ортаны қорғауға бағытталған ауқымды қоғамдық қозғалысқа айналды. Бастама аясында атқарылып жатқан жұмыстардың негізгі мақсаты көшелер мен аулаларды тазартумен ғана шектелмейді. Оның басты мұраты – қоғамда экологиялық жауапкершілікті орнықтырып, туған жерге жанашырлықпен қарауды әр азаматтың күнделікті өмір салтына айналдыру. Бүгінде бұл бағыттағы жұмыс облыста да кеңінен жалғасып, өңірдің келбетімен қатар тұрғындардың тазалыққа деген көзқарасына оң ықпал етіп келеді.

Қазақ халқы тазалықты тәннің ғана емес, жанның да қасиеті деп таныған. «Жаны таза», «ниеті таза», «ары таза» деген тіркестер бұл ұғымның халқымыздың дүниетанымында адамгершілікпен қатар тұрғанын аңғартады. Үйдің табалдырығын таза ұстау, бұлақтың көзін ашу, айналыны күтіп-баптау – атадан балаға жалғасқан тіршілік әдебі әрі туған жерге деген құрметтің көрінісі.

Сондықтан «Таза Қазақстан» бізге жат ұран емес. Ол – ұлттық болмысымызда бұрыннан бар ұқыптылық пен жауапкершілікті жаңғыртып, оны қоғамның ортақ қағидасына айналдыратын бастама. Ағаш еккен қарияның, мектеп маңын тазалаған оқушының, қоқысын белгіленген уақытта шығарған отбасының әрекетінен қаланың мінезі қалыптасады. Техника көшені тазартады, заң тәртіпке шақырады. Ал тазалықты баянды етіп, оны күнделікті өмір салтына айналдыратын негізгі күш – адамның ішкі мәдениеті.

Президент Қасым-Жомарт Тоқаевтың бастамаға қатысты пікірі де осы ұлттық түсінікпен сабақтасып жатыр. Мемлекет басшысы: «Таза Қазақстан» – ұлттық идеологиямыздың ажырамас бөлігіне айналды. Тазалық халқымыздың адал ниеті мен таза пейілінен басталады. Бұл – ең алдымен көшелерді, үйлерді таза, ұқыпты ұстау деген сөз. «Таза Қазақстан» – әдемі ұран да, науқан да емес, бұл – күнделікті қажырлы еңбектің нәтижесі. Тазалық тәртіпті күшейтеді, ал тәртіп жауапкершілікті арттырады. Осы маңызды тұжырымды ұрпақтың санасына сіңіру өте маңызды. Біз сонда ғана нағыз өркеніетті және ілгері қадам басушы озық ел боламыз» деп тазалықтың қоғамдық мәнін айқын түйіндеді.

ТАЗАЛЫҚТАН БАСТАЛҒАН ЖАҢҒЫРУ

СЫР ЕЛІНДЕГІ СЕРПІЛІС

Облыста Президент бастамасы ауқымды қоғамдық қозғалысқа ұласты. Жыл басынан бері тазалық шараларына 230 мыңнан астам ерікті, қоғам белсендісі, бюджет саласы мен кәсіпорын қызметкері қатысып, елді мекендердің көркеюіне ортақ үлес қосты.

Атқарылған жұмыстардың нәтижесінде өңір аумағынан 5,5 мың тоннадан астам қалдық шығарылып, 500-ден аса саябақ пен сквер, 250-ден астам тарихи-мәдени ескерткіш, мыңнан астам әлеуметтік нысан және 1200-ден аса кәсіпкерлік пен өндірістік нысан тазартылды. Сонымен қатар 300-ден астам өзен-көл, арық және өзге де су нысаны ретке келтіріліп, 15 мыңнан аса көше бойы мен тұрғын үй аласы абаттандырылды. Бұл ауқымды жұмыстарға 500-ден астам арнайы техника жұмылдырылып, өңірдің табиғи жағдайына бейім 88 мыңнан аса көшет егілді. Бұл – құр есеп емес.

Әр санның артында адам еңбегі мен жанарған орта тұр. Ең бастысы, іске коммуналдық мекемелермен бірге қоғамның түрлі тобы араласты. Соның арқасында «қала – әкімдіктікі» деген түсініктің орнын «қала – бәріміздікі» деген сана қалыптасты. Қызылорда қаласы да кейінгі он жылда едәуір кеңейді. 2016 жылы мұнда тазалық жасалатын 240 көше болса, 2026 жылы олардың саны 830-ға жуықтаған. Қала шекарасы ұлғайған сайын тазалық қызметінің жауапкершілігі де еселенді. «Қызылорда тазалығы» кәсіпорнының басшысы Сапарғали Асылбековтің айтуынша, маусымдық жұмыстарға 200-ден астам жұмысшы мен 90 арнайы техника

жұмылдырылады. Қоқыс таситын көліктер, су себетін машиналар және жол жиегіндегі шанды соратын техникалар тұрақты жұмыс істейді.

Жаз мезгілінде тазалық қызметкерлері жұмысын таңғы сағат 07.30-да бастайды. Осы уақытта қала көшелері сыпырылып, арықтар тазаланады, арамшөптер шабылып, жол жиектері жуылады. Ағаштар мен бордюрлерді әктеу, көшелерге су себу жұмыстары да күнделікті жоспарға енгізілген. Күннің аптап ыстығына байланысты түскі үзілістен кейін жұмыс қайта жалғасып, кешкі сағат 19.00-ге дейін жүргізіледі. Ал қыс мезгілінде қар тазалау, жолдарға құм-тұз қоспасын себу және көктайғақтың алдын алу шараларына басымдық беріледі.

– Қоқыс шығару әр көшеге арнайы бекітілген кесте бойынша ұйымдастырылады. Көпқабатты тұрғын үйлер контейнерлермен толық қамтылған. Жеке сектор тұрғындарының шамамен 30 пайызы өз қоқыс жәшігін орнатқан, ал қалған тұрғындар тұрмыстық қалдықтарын белгіленген күні шығарып қояды. Толған контейнерлер танертең және кешкі уақытта тазаланады, – деді кәсіпорын басшысы.

Оның сөзінше, тұрғындардың белгіленген кестені сақтауы коммуналдық қызмет жұмысының сапасына тікелей әсер етеді. Қалдықтың уақытынан бұрын немесе беймезгіл уақытта көше қиылысына шығарылуы сол аумақтың қайта ластануына әкеледі. Ал әр отбасы ортақ тәртіпке жауапкершілікпен қараған жағдайда қоқысты жинау және тасымалдау жұмыстары да жүйелі атқарылады.

Белгіленбеген жерлерге қалдық тастайтын азаматтарды анықтау үшін кәсіпорынның мобильді тобы қалалық полиция басқармасымен бірлесіп тұрақты рейд жүргізіп келеді. Былтыр тазалық талаптарын бұзғандарға 1359 айыппұл салынған. Құрылыс қалдықтарын заңсыз төккен тұрғындар мен кәсіпкерлерге әкімшілік шара қолданылып қана қоймай, аумақты өз қаражаты есебінен тазарту міндеті жүктеледі.

– Біздің мақсатымыз айыппұл санын көбейту емес. Ең бастысы – тұрғындардың тазалыққа деген көзқарасын өзгертіп, жауапкершілігін арттыру. Адам ешкім бақылап тұрмаған кезде де

қоқысты белгіленбеген жерге тастамауы керек. Қаланың тазалығы коммуналдық мекемеге ғана емес, әрбір тұрғынның мәдениеті мен жанашырлығына байланысты, – деді Сапарғали Асылбеков.

ЖАСТАРҒА СІҢГЕН ЖАУАПКЕРШІЛІК

Экологиялық мәдениеттің тамыры білім ордаларында қалануға тиіс. Қорқыт ата атындағы Қызылорда университетінде «Таза Қазақстан» жастар тәрбиесінің маңызды бағытына айналған. Студенттер құрған «Eco Life» клубы көгалдандыру, тазалық акциялары мен экологиялық ағартушылық жұмыстарын тұрақты ұйымдастырып келеді.

Университет ректоры Наурызбай Байқадамов экологиялық мәдениетті бір реттік шара емес, үздіксіз жүргізілетін тәрбие мен білім беру үдерісі деп бағалайды. Өткен оқу жылында бастамаға студенттердің 70 пайызы және профессор-оқытушылар құрамының барлығы қатысқан.

– «Таза Қазақстан» – қоршаған ортаны көркейтуге бағытталған бір реттік науқан емес, жастардың бойына туған жерге жанашырлық пен қоғамдық жауапкершілікті сіңіретін маңызды тәрбие мектебі. Студент бүгін өз қолымен көшет отырғызып, айналасын таза ұстауға үлес қосса, ертең сол ұстанымды кәсібінде де, отбасында да жалғастырады. Сондықтан экологиялық мәдениет университет қабырғасында дәріспен ғана емес, нақты іспен қалыптасуы керек. Біз жастардың табиғатқа ұқыпты қарауын күнделікті өмір салтына айналдыруды көздейміз, – деді Н. Байқадамов.

Парапауэрлифтингтен Әлем чемпионы, Қазақстанның еңбек сіңірген спорт шебері Фариза Төлжанның пікірі де осы оймен үндеседі. Спортта биік нәтиже тәртіп, тәзім мен күнделікті еңбектің арқасында келсе, тазалық мәдениеті де тұрақты жауапкершілікті талап етеді.

– Президентіміздің «Таза Қазақстан» бастамасын толық қолдаймын. Спортшы ретінде тазалық акцияларына қатысып, қоршаған ортаны таза ұстауға өз үлесімді қосуға тырысамын. Таза орта – дені сау қоғамның негізі. Әр адам тазалықты өз үйінен, ауласынан бастап, өзгелерге үлгі көрсетуі керек. Жеңіс тек спорт алаңында емес, туған жерге пайдалы іс жасаудан да көрінеді, – дейді Әлем чемпионы.

Оның сөзінде үлкен мән бар. Спорт адамды тәртіпке үйретсе, тазалық сол тәртіпті күнделікті өмірде орнықтырады. Ал елге танымал спортшылардың осындай қоғамдық бастамаларға белсенді араласуы жас буынға әсер етіп, табиғатты аялау мен туған жерді құрметтеудің нақты үлгісін көрсетеді.

ҚАЛДЫҚ ЕНДІ ТЕК ҚОҚЫС ЕМЕС

«Таза Қазақстанның» келесі кезеңі қоқысты полигонға жеткізумен шектелмеуге тиіс. Қалдықты сұрыптап, қайта өңдеп, өндірістік айналымға қайтару – заманауи экологиялық саясаттың басты талабы. Осы бағытта Қызылордада қатты тұрмыстық қалдықтарды өңдеу зауытының құрылысы қарқынды жүріп жатыр.

Оңтүстік Корея технологиясына негізделген жобаның құны 34,5 миллиард теңге. Алғашқы кезеңде қазіргі полигон жаңғыртылып, жылына 300 мың тонна қалдық сұрыптайтын кешен салу көзделген. Полигонның өткізу қуаты 60 мың тоннадан 300 мың тоннаға дейін артады. Жиналған шыны қалдықтарын өңдеп, жылына 240 миллион дана шыны ыдыс өндіруге арналған жоба да экология мен экономиканы ұштастырмақ. Кеше пайда-сыз қоқыс саналған қағаз, пластик пен шыны ертең жаңа өнімнің шикізатына айналады. Бұл табиғатқа түсетін салмақты азайтып, жасыл экономиканы дамытуға жол береді. Бірақ зауытпен бірге тұрмыстық әдет те өзгеруі керек. Қалдықты үйден бастап бөлек жинау мәдениеті орныққанда ғана қайта өңдеу жүйесі толық қуатында жұмыс істейді. Қазір осы бағытта пилоттық жобалар қарастырылуда.

2026 жылы «Шалқар Инновейшн» ақпараттық жүйесін іске қосу жоспарланған. Ол қоқыс жинау бағыттарын GPS арқылы бақылауға, абоненттік база, келісімшарттар мен төлемдерді цифрлық форматта жүргізуге мүмкіндік береді. Арнайы техниканың қозғалысын бақылау жұмыс тиімділігін арттырып, шығынды оңтайландырады.

Сыр өңірінің аптап ыстығы, құрғақ ауасы мен шанды желі қала экологиясына айрықша талап қояды. Сондықтан Қызылорда аумағында 992 гектар жасыл белдеу қалыптастыру және 2030 жылға дейін 2,5 миллион ағаш отырғызу жоспарының маңызы ерекше.

Ағаш отырғызу – көшетті жерге қадап кетумен аяқталмайды. Оны суару, күтіп-баптау, жерсіндіру керек. Тұрғын үйінің алдындағы ағашқа жанашырлық танытып, кәсіпкер нысанының маңын көгалдандырғанда, жастар еккен көшетін жылдар бойы бақылағанда ғана қаланың жасыл келбеті орнықты қалыптасады.

ЕҢ ҮЛКЕН НӘТИЖЕ – САНАДАҒЫ ӨЗГЕРІС

«Таза Қазақстанның» ең құнды нәтижесі есеп кестесіндегі көрсеткіштермен ғана өлшенбейді. Оның шынайы жемісі – адамдардың ойлау жүйесі мен күнделікті әдетіндегі өзгеріс. Бұрын «Бұл жерді кім тазалайды?» деген сауал жиі айтылса, бүгінде «Осы аумақтың таза болуына мен қандай үлес қоса аламын?» деген түсінік орныға бастады. Бір аулада қатар еңбек еткен түрлі буын өкілдерін ортақ іс жакындастырып, туған жерге деген жанашырлықты күшейтеді.

Тазалық адамды ұқыптылыққа, ұқыптылық жауапкершілікке, ал жауапкершілік елге деген құрметке бастайды. Өз ауласын таза ұстаған адам көшесіне де бейжай қарамайды. Көшесін қадірлеген тұрғын қаланың ортақ мүлкіні қорламайды. Ал туған қаласының келбетіне жанашыр болған азамат елінің ертеңіне де жауапкершілікпен қарайды. Осылайша қарапайым тұрмыстық тәртіп азаматтық мәдениетке, ал азаматтық мәдениет отаншылдыққа ұласады.

Қызылорданың көшесінде еңбек етіп жүрген тазалықшының қолындағы сыпырғыш тек шанды тазалап жатқан жоқ. Ол қала өміріндегі қала тәртіпке жол ашып келеді. Ағаш отырғызған адамның алақанындағы топырақ – болашақ алдындағы жауапкершіліктің белгісі. Қоқысын белгіленген кестеге сай шығарған тұрғынның әрекеті көзге елеусіз көрінгенімен, ортақ мәдениетті қалыптастыратын маңызды үлес.

– Тазалық дегеніміз – ең алдымен, ішкі мәдениеттің өлшемі. Еліміздегі әр азаматтың жаны таза, қолы мен ісі таза болса, шын мәнінде озық ойлы ұлтқа айналамыз, – деді Президент Қасым-Жомарт Тоқаев.

Мемлекет басшысының бұл пікірі «Таза Қазақстан» бастамасының түпкі мақсатын дәл аңғартады. Өйткені таза қала тек коммуналдық қызметтің күшімен қалыптаспайды. Көшеге шыққан техника мен атқарылған жұмыстың көлемі маңызды болғанымен, тұрақты нәтиже әр тұрғынның өз ауласына, көшесіне және ортақ кеңістікке жауапкершілікпен қарауынан басталады. Осы тұрғыдан алғанда, Сыр өңірінде жүзеге асып жатқан шаралар қаланы көркейтуге ғана емес, қоғамдық тәртіп пен азаматтық сананы орнықтыруға бағытталған.

Бастаманың басты құндылығы да осында. «Таза Қазақстан» белгілі бір мерзімде өткізілетін сенбілік емес, адамның күнделікті әдетіне айналуға тиіс өмірлік ұстаным. Әркім тазалықты өз шаңырағынан бастап, оны ауласына, көшесіне, туған қаласына деген құрметпен жалғастырғанда ғана ортақ мәдениет қалыптасады. Тазалыққа ұқыпты қарау – туған жерге жанашырлықтың, ел болашағына деген жауапкершіліктің айқын көрінісі. Осындай түсінік орныққан қоғамның нәтижесі де көркем, болашағы да баянды болмақ.

Бағлан АМАНЖОЛ,
«Сыр бойы»





Сурет: Шығармашылық

Біз білгенде «Ақ шағала» дейтін бірнеше ән бар. Жүрек айдынындағы өзінің ақ шағаласын іздеп шарқ ұрған қаншама жандар болған, олар қазір де жоқ емес... Бір әннің шығу тарихын сөз ете келе жасындай жарқ етіп, құйрықты жұлдыздай ағып өткен аса талантты ақын жайлы қалам тербеуді жөн көрдік. Ол – ақын, ол – композитор, ол – әнші, ол – көшбасшы. Ол – табиғат ана ажар-көрікті аямай беріп, сымбатты етіп жаратқан сегіз қырлы, бір сырлы жігіт, «ҚазМУ-дың Сәкені» атанған Бауыржан Үсенов.

Бауыржан Үсенов Жамбыл облысы, Жуалы ауданы Қошқар ата ауылында 1960 жылдың 16 тамызында дүниеге келген. Сол ауылдағы Абай атындағы орта мектепте білім алған. Әскери борышын өтеп қайтқасын Қазақ Мемлекеттік университеті журналистика факультетінің дайындық курсына түседі. Сөзіміз дәлелді болу үшін қаламгер Әнуарбек Әуелбектің «Жыр найзағайы» атты көлемді мақаласынан үзінді жазайық: «Өмірде сан түрлі адамдар кездеседі, әрине бәрінің өз орны, өз жолы бар. Бауыржанның орны жүрек төрінде мәңгіге қалды. Өз өлеңдерімен қоса, өзі құрмет тұтатын ақындардың өлеңдерін жиі қайталап, айтып жүретін. Үлкеніміз Мейрамбек Шілдебаев, одан кейін Бауыржан Үсенов, Ескендір Ертаев, Талғат Батырханов және мен – бесеуіміз ҚазМУ қалашығындағы №8 жатақханада бір бөлмеде тұрдық. Бұл филология факультетінің жатақханасы болатын. Дайындық бөлімінде филфак пен журфактың тыңдаушылары бір топта оқитын еді. Сол бір сәттер көңілде ыстық қалпында ұмытылмай сақталып қалды...» Бауыржан Үсенов келе сала жұрттың жүрегінде сақталатындай жауһар жырлар жазған. Журналистика факультетінің ұстазы Мамытбек Қалдыбай бірінші курста оқып жүрген бота тірек 4 студентін Бауыржан Момышұлына ертіп апарып, батасын алдыртыпты. Солардың бірі Үсенов екен...

Белгілі ақын, Мемлекеттік сыйлықтың иегері Светкалі Нұржан былай деп еске алады: «1981 жылы ҚАЗМУ қалашығында Бауыржан Үсеновпен таныстым. Ол дайындық курсынан өтіп келген екен. ҚАЗМУ қалашығының аумағы үлкен, әлі көп құрылыстар түсе қоймаған кезі. Маужырап, тұнып тұрған тұмса табиғат! Кешкілік әр жақтан талап қылып келіп, студент атанған бір топ жігіттер аулақтау жерге жиналып, сұхбат құрдық, ән айттық. Ай жарығында кезектесіп өлеңдерімізді оқыдық... Бауыржан да оқыды, сосын әсем-қоңыр үнімен бірнеше ән салды. Сұмдық әнші екен. Сол түн менің мәңгі есімде қалды. Талантты ақын, талантты сазгер-керемет туындылар туырды. Әндері бір әлем, әншілігі бір әлем болған Бауыржан бұрынғы өткен сал-серілердің соңғы тұяғындай еді. Бұл пәниде бар жарығын шаша алмай, бар бүршігін аша алмай кеткендер аз болмаған ғой. Бауыржан солардың бірі және бірегейі бауыратын...».

«Ақ шағала» әніне келейік. «Дарын» сыйлығының иегері, ақын Әубәкір Смайл былай деп сыр шертеді: «1986 жылдың қыркүйек айында ҚазМУ-дың бір топ студенттері ауыл шаруашылығы жұмыстарына көмек беру үшін Қостанай облысына бардық. Оның ішінен 12 жігітті бөліп алып, Бауыржан Үсеновті басшы етіп, Қозыбаев атындағы колхозға әкелді. Жаңадан салынған мектептің бітпей қалған жұмыстарын аяқтап, бітіріп беру бізге тапсырылды. Осы 12 жігіттің бәрі кейін елге танымал азаматтар болды. Бауыржан маған бір әннің дүниеге келгенін, бірақ әлі мәтіні жоқ екенін айтты: «Әубәкір екеуіміз шығармашылық одақ жасайық» деп өтініш білдірді. Мен қолыма қалам алып, «Ақ шағала» деген өлең жазуға кірістім. Бұл менің әнге алғашқы әнге жазуым еді, мұнан кейін ешқандай әнге мәтін жазған еместін. Ән

бірден ауыздан-ауызға тарап кетті. Алматыға қайтар жолда, пойыз үстінде студенттер лезде үйреніп алып, «Ақ шағаланы» шырқап қайтқанбыз... Келгесін де ән айтылып жүрді. Бірақ үлкен сахнаға шығады деп ойламаппын. Мұны Бауыржан тыңдай алмай кетті... Саят Медеуов пен Ақбота Керімбекованың орындауында «Ақ шағала» соншалықты әсем нақышпен ән-диалог ретінде айтылып, тыңдарманның құлақ құрышын қандырады. Қыздың сөзі (Мәтіндегі Ақботаның орындауындағы ән шумақтарын айтып отыр) менікі емес... Бірақ үйлесімді орындалып, жүрекжарды ән-диалог болып құлпырып кеткеніне қуанамын.» Реті келіп тұрғанда «Ақ шағала» әнінің толық мәтінін жазайық:

САЯТ: Дір-дір етіп бала белең
Бас бұрғызбай ағалды екен
Жалғыз күтіп тұрмын сені
Жалғыз күтіп жағада мен
Көз жасындай көкпен жұлдыз
Көкжиекке тамады әрең
Қоштасарда қолын бұлғай,
Қимастықпен қарағаны
Ұя салдың жағаға қай,
Менің аппақ шағалам-ай?
АҚБОТА: Мен сенің жанарыннан

жасқанамын,
Қанатын қаға алмады аспан әнім.
Жол жакка жаутаң-жаутаң

қараймын деп,
Қалмады қайтем менің басқа амалым.
Жол жакка жаутаң-жаутаң

қараймын деп,
Қалмады қайтем аға басқа амалым.
САЯТ: Адамбыз ғой кінәлағыш,
Айыпты да тағар оңай.
Кеттің неге жырақ-алыс,
Кеттің неге ағаламай.
Мен таяздық таныттым ба,
Бақытымды бағаламай.
Бұл қоштасу қайбір жаным,
Тиді дейсің маған оңай.
Ұя салдың жағаға қай,
Менің аппақ шағалам-ай?
Ақбота: Жыры көп айтары бар

қыз баланың,
Жас түгіл, жанарында күлкі ойынатып,
Мен сені өзімнен де қызғанамын.
Жас түгіл жанарыңда күлкі ойынатып,
Мен сені өзімнен де қызғанамын.
Екеуі қосылып:
Көз жасындай көкпен жұлдыз,
Көкжиекке тамады әрең.
Қоштасарда қолын бұлғай,
Қимастықпен қарағаны.
Ұя салдың жағаға қай,
Менің аппақ шағалам-ай?
Ұя салдың жағаға қай,
Менің аппақ шағалам-ай?
Тыңдап отырып риза боласын... Бұл әнге дейін де «Раймалы мен Бегімәйдің жырын» келістіре ән-диалог ретінде тебірене әрі құлпытра шырқаған Ақбота Керімбекова мен Саят Медеуовті ән әлемінің жұлдыздары десек болады. Әсіресе Ақботаның еңбегі өлшеусіз. Олай дейтін себебіміз, Ақбота ән-диалогты өнер өлкесіне бірінші әкелуші деп білсек керек. Алғаш рет біздің жерлесіміз, марқұм Нәби Әмірұатовпен ән-диалог орындаған. Ол әннің аты да «Ақ шағала» болатын. Бірақ ол жоғарыда біз жазып отырған Бауыржан Үсеновтің «Ақ шағаласы» емес, басқа «Ақ шағала» еді. Бұл диалог-ән қазақ телевидениесінің «алтын қорында» сақтаулы... Негізгі тақырыпқа

оралайық: Үсеновтің «Ақ шағаласы» кім болды екен? Әнді ол кімге арнаған? Бірге оқыған курстастары бір қызық жайды еске алады. Көрші филологтардың жатақханасында тұратын Қызылорданың қызы Гауһарға Бауыржан жүрегіннің бар билігін берді:

Куә ғып Алматының барқыт түнін,
Сен мені құшағыңда балқыт күнім.
От көрген көбелектей келе берсем,
Ол сенің бар сұлудан артықтығың, –
деп кешке қарай 8-ші жатақханадан шықпай қойып еді. Қалай дегенде Бауыржанның «Ақ шағаласы» өзінің сүйіктісі, кейін екі баласының анасы болған Тәжікенова Гауһар Жұматайқызына арналған болар?!
Осы жерде Бауыржанның бар сұлудан артық көрген Гауһарына құлақ асайық: «Бауыржан біздің бөлмеге жиі келіп жүрді. Кейде бөлмемізде отырып өлең жазды. Светкалі Нұржан, Бауыржан Омаров, Еркін деген достарын бірге ертіп келетін. Ақыры бір күні Бауыржан маған ғашық екенін айтты... Содан соң Баукең екеуіміздің арамыздағы таныстық үлкен махаббатқа ұласты. Ол кезде екеуіміз де бірінші курста оқитынбыз. Сөйтіп 1985 жылы жазда шаңырақ көтердік. Мен төртінші курсты бітіріп, бесінші курсқа өткен кезім еді.

Ол мені үш жүзден тандап алған аруым дейтін.»

Аз ғұмырында Бауыржан Үсенов мықты ақындығымен де, әнші-сазгерлігімен де танылған. Оның «Ақ шағаладан» бөлек бірнеше әндері болыпты. Ол шығармалары бізге жетпей тұр. Кезінде нотаға түспеді ме әлде өзінен басқа жұрт үйреніп, келістіре орындай алмады ма, ол жағы беймәлім... Жакында дереккөздерінен атыраулық әнші Әбдіхан Есенғалиевтің домбыраға қосып орындаған Бауыржан Үсеновтің «Перронда» деген әнін қайта-қайта тыңдадым. Минорлық лапта жазылған тап-тәуір ән екен...

Ерекше тоқтала кетуіміз керек, Бауыржан 1986 жылғы желтоқсан көтерілісіне қатысқан. Ол жайлы бірге болған досы Аманкелді Әбіл былайша еске алады:

«16 желтоқсан күні 4 қатар болып, орталық алаңға бет түзедік. Алаңға жақындай бергенде Бауыржан Шәмші Қалдаяқовтың «Менің Қазақстаным» әнін бастады. Оған артта келе жатқан ҚазМУ студенттері түгел қосылып шырқағанда ән көкке шарықтады. Бауыржанның дауысы керемет қайталанбас дауыс еді ғой... Алаңға кірдік. Күн суық, ызғарлы. Өрт сөндіргіш машиналар алаңға оқтын-оқтын су шашады.

– Бауке, мұның соңы жаман болады, қайтайық, – дегенімде: – Бұл жүз жылда қайталанбайды. Көресің тәуелсіздігіміздің бастауы осы күн болады, – деді ол жылып алғандай. Ол кезде тәуелсіздікті ауызға алмақ түгілі, ойлаудың өзі қорқынышты еді.

Қайран досым тәуелсіздіктің босағасына келіп тұрып, тәуелсіздік танығның атқанын көре алмады...» Әбділдә Тәжібаев атындағы облыстық кітапханада Бауыржан Үсеновтің екі өлең кітабы бар екен. Соның 2012 жылы «Жазушы» баспасынан шыққан «Менің бұлтым» атты жыр кітабын парақтадым. Кітаптың соңғы жағындағы «Желтоқсан жаңғырығы» поэмасының алғы сөзіне автор былай деп жазыпты: «Алматыға жолым түсіп бара калсам, міндетті түрде «Республика» атындағы алаңға соғамын. Алаңға кіре бергенде денем түршігіп, төбе-құйқам шымырлап кетеді. Есіме дүниені дүр сілкіндірген желтоқсан оқиғасы түседі. Мұздақ алаңның үстінде жығылып-сүрініп атой салған демократияның алғашқы қарлығаштарының ішінде қанға боялса да, қайтпай тұрып алған қыз-жігіттердің арасында мен де, сен де бар едік. Қайрат! Бірақ, бір-бірімізді танымайтынбыз. Алаң ортасынан бір зор айқай шығып тұрды. Күні бүгінге дейін сол айқай құлағымда жүр. Сол дауыстың иесі сен шығарсың деп ойлаймын. Себебі, сенің жазан бәріміздікінен ең ауыр жаза болды ғой...».

Бауыржан Үсенов мұрасын зерттеуші ақын Мырзахан Ахмет мынадай түйінді сөз айтты: «Бауыржан Үсеновтің өлеңдері өзінің көркемдігімен де, кемелдігімен де ерекше. Бірақ, ол осы уақытқа дейін өз оқырмандарын толық таба алмай келді. «Білгің келсе жырымды оқы, онда менің жүрегім тұр» деп ақынның өзі өсиет еткендей Бауыржанның кім екенін, қандай ақын болғанын білгісі келген әр қазақ оның өлеңін оқыса, сөз жоқ қазақ поэзиясының бір кәусарынан сусындаған болар еді. Сол кәусар бұлақтың көзі енді ашылды. Бұл ақынның сарғайып жатып, жарыққа әзер шыққан жыр кітабы.

«Іә, ақын деген өлмейді жыр аманда...» деген сар екен... Мақала аяғында Светкалі Нұржан ақынның тағы бір естелік сөзін бергіміз келді: «1991 жылдың сәуірінде Алматыға курсқа бардым. Сонда Бауыржан Тараздан келіп, оқуын жалғастырағын жүр екен. Жұмабай Құлиев, Табылды Досымовпен бірге солардың бөлмесінде отырып біраз сырластық. Шыққасын Тимирязев көшесіне дейін бірге келдік. Қимай қоштастық. Бір автобус келіп тоқтап, есігін екі жакка ырситып ашты да қайта жауып, жұтып жіберді. Сол ең соңғы жүздесуіміз екен, көп ұзамай суық хабар жетті.

Ілеспі ап соңына бір ақ құстың
Жыраққа ұшқым келіп ед,

жыраққа ұшқым.
Өртеніп жатыр екен тау баурайы,
Күйіп қалып қанатым құлап түстім, –
деп өз тағдырын өзі болжаған Бауыржан небәрі 31 жасында пәниден бақиға аттанып кете барды. Өткен жылдың мамыр айында Жамбыл облыстық телеарнасы «ЖЫР-ҒҰМЫР» атты деректі фильм түсіріпті. Осында талантты ақынның тағдыры біршама баян етілген.

Темірбек ЕСЖАНОВ,
ҚР Білім беру ісінің құрметті
қызметкері, Қазақстан Журналистер
одағының мүшесі

/// ҒЫЛЫМ ЖЕТІСТІГІ



Қойдың құйрық майы қазақ тұрмысында ежелден қадірлі. Енді ол ғылымның зерттеу нысанына айналды. Қорқыт ата атындағы Қызылорда университеті Т.Қуанышбаев атындағы химия-биологиялық зерттеу ғылыми-білім беру орталығының қызметкерлері соның негізінде табиғи ылғалдандырғыш крем әзірледі. Ұлттық тәжірибені заманауи ғылыммен ұштастырған өнімнің ерекшелігі, оның адам терісіне пайдасы және өндіріске қашан шығуы мүмкін екені туралы орталықтың бас ғылыми қызметкері, химия ғылымдарының кандидаты Гүлмира Абызбекова айтып берді.

Кремнің негізгі табиғи компоненті – Қойдың құйрық майы

– **Идея қалай пайда болды?**

– Қойдың құйрық майы халық арасында бұрыннан қолданылып келеді. Біз осы табиғи шикізаттың қасиетін ғылыми тұрғыдан зерттеп, оны заманауи косметикалық өнімге айналдыруды мақсат еттік. Сыр өңірінің табиғи-климаттық жағдайы да зерттеу бағытын таңдауға әсер етті. Құрғақ әрі шұғыл континенталды климат терінің ылғалын азайтып, қорғаныс қабатына кері әсер етуі мүмкін. Сондықтан терінің табиғи жолмен ылғалдандырып, қорғауға мүмкіндік беретін өнім әзірлеуге ден қойдық. Зерттеуге өзім және орталықтың аға ғылыми қызметкерлері, химия ғылымдарының кандидаты Гүлжан Балықбаева, биология ғылымдарының кандидаты Райхан Жан-дәулетова, техника ғылымдарының кандидаты Шолпан Еспенбетова және Анипа Тапалова, педагогика ғылымдарының кандидаты Камила Арынова, жас зерттеуші, 4-курс студенті Аружан Талғатова қатысты.

– **Кремнің құрамында қандай табиғи компоненттер бар?**

– Өнімге бес табиғи компонент енгізілді. Негізгісі – қойдың құйрық майы. Сонымен бірге жүзім тұқымының майы, ара балауызы, жалбыз және лаванда эфир майлары қолданылады. Әр компоненттің өзіндік қызметі бар. Құйрық майы теріні ылғалдандырып, жұмсартуға ықпал етсе, жүзім тұқымының майы теріні қоректендіреді. Ара балауызы кремнің құрылымын қалыптастырып, теріні сыртқы әсерден қорғайды. Ал жалбыз бен лаванда эфир майлары өнімге жағымды хош иіс береді.

– **Өнімнің қауіпсіздігі қалай зерттелді?**

– Крем Алматы қаласындағы «Текс» серіктестігі сынақ орталығының аккредиттелген зертханасында сынақтан өтті. Зерттеу барысында өнім құрамынан мышық, сынап, қорғасын сияқты улы заттар анықталған жоқ. Микроорганизмдер мен бактериялар да табылмады. Өнімнің рН көрсеткіші 6,1 болды. Бұл терінің табиғи ортасына жақын, яғни әзірленген өнімнің қауіпсіздігіне қатысты негізгі көрсеткіштер зертханалық деңгейде тексерілді.

– **Құйрық майын косметикалық өнім ретінде кенінен қолдану неге жолға қойылмады?**

– Оның өзіндік ерекшеліктері бар. Табиғи күйіндегі құйрық ма-

йының иісі өткір, құрылымы тығыз. Дұрыс өңделмеген жағдайда теріге баяу сіңіп, майлы қабат қалдыруы мүмкін. Біздің міндетіміз – осы табиғи шикізатты заманауи талапқа бейімдеу. Сондықтан құйрық майын жүзім тұқымының майы, ара балауызы, лаванда және жалбыз эфир майларымен белгілі бір арақатынаста біріктірдік. Нәтижесінде жағымды иісі, жұмсақ құрылымы және теріге жақсы сіңетін қасиеті бар крем алынды.

– **Крем кіндерге арналған және қандай мәселелерді шешуге бағытталған?**

– Негізінде бет пен қолдың өте құрғақ, жарылған, зақымдалған терісіне арналған. Өнім терінің құрғауын азайтып, оның табиғи қорғаныс қабатын қалпына келтіруге бағытталған.

– **Өнімді өндіріске енгізу жоспарда бар ма?**

– Қазір өнім зертханалық деңгейде әзірленіп, пайдалы модель ретінде патенттік жаңалығы бекітілді. Бірақ патент алу жұмыстың соңғы кезеңі емес. Өнімді жаппай өндіріске шығару үшін оның сақталу мерзімін ұзарту, рецептурасын одан әрі жетілдіру, стандарттау және сертификаттау жұмыстарын жүргізу қажет. Сонымен қатар өндірістік серіктестер мен инвестиция керек. Алдағы мақсатымыз – ғылыми зерттеу нәтижесін нақты өндіріске енгізу.

– **Бұл жоба отандық ғылым мен косметика өндірісіне қандай үлес қоса алады?**

– Ең алдымен, бұл – жергілікті табиғи шикізатты ғылыми тұрғыдан зерттеп, одан отандық өнім жасауға болатынын көрсететін жоба. Болашақта қойдың құйрық майымен ғана шектелмей, өңіріміздегі табиғи өсімдіктерді, жануарлардан алынатын шикізаттарды пайдалана отырып, өзге де органикалық косметикалық және емдік-профилактикалық өнімдер әзірлеуді жоспарлап отырмыз. Қазақтың дәстүрлі тәжірибесінде пайдаланылған табиғи ресурстарды ғылыммен ұштастыру арқылы импортты алмастыратын отандық әрі экологиялық таза өнімдер жасауға мүмкіндік бар деп есептейміз.

– **Әңгімеңізге рахмет!**

Әңгімелескен
Назерке САНИЯЗОВА,
«Сыр бойы»



Сурет: Аппақ шағалам

/// БІЛІМ

ТУҒАН ЖЕРДІ ТАҢУ – ОТАНСҮЙГІШТІКТІҢ НЕГІЗІ

«Шын мәнінде, отансүйгіштік – құрғақ ұран мен бос сөз емес. Отансүйгіштік – туған елге, атамекенге деген сүйіспеншілік. Ол ең алдымен туған жердің табиғатын, тарихы мен мәдениетін, әдет-ғұрпын терең білуден басталады», деген болатын Мемлекет басшысы Қасым-Жомарт Тоқаев.

Мемлекет басшысы атап өткендей, шынайы патриотизм құр сөзден емес, туған өлкенді, оның табиғи байлығы мен географиялық ерекшелігін терең түсінуден бастау алады. Осы орайда, ҚР Оқу-ағарту министрлігі тарапынан биыл қабылданған шешімдер мектептегі білім сапасын арттырудағы елеулі бетбұрыс болды. Әсіресе, 8 және 9-сыныптарда «Қазақстан географиясы» курсын толыққанды меңгеру үшін аптасына 2 сағат бөлініп, барлық қажетті жағдайдың жасалуы – оқу бағдарламасын тереңдетіп оқытуға жол ашқан стратегиялық қадам.

Бұл – сағат санын ғана көбейту емес, өсіп келе жатқан жас ұрпақтың бойына ұлттық сана-сезім, отансүйгіштік пен экологиялық жауапкершілікті дарытудың нақты құралы. Мен пән мұғалімі ретінде бұл жа-нашылдықты өте уақытылы әрі орнықты бастама деп білемін. Өйткені



Фотом: akorda.kz

өз елінің картасын, ресурстарын, экономикалық әлеуетін білмейтін азаматтан туған жерге деген жана-шырлық күту мүмкін емес. Ұлттық сәйкестік пен елге деген құрмет 8-9-сынып оқушылары – өз дүние-танымын қалыптастырып, азамат-тық ұстанымын айқындайтын жас-та. Нақты кезеңде «Қазақстан географиясы» пәніне аптасына 2 сағат бөлінуі оқушыларға материал-ды асықпай, сапалы сіңіруге мүмкін-дік береді.

Оқу-ағарту министрлігі тарапы-нан жасалған бұл жағдай – география мұғалімдері үшін үлкен мүмкіндік

әрі зор жауапкершілік. Басты мақ-сатымыз – оқушыға құрғақ факті-лерді беру емес, туған жерінің әрбір тасын, әрбір өзенін бағалайтын, елі-нің дамуына үлес қосуға дайын са-налы да азат ойлы ұрпақ тәрбиелеу. Қазақстанның әрбір шаршы метрі – біздің ортақ үйіміз, ал оны танып-білу – өсіп келе жатқан әрбір өреннің парызы.

Алтынбек ҚЫСТАУБАЕВ,
Жамбыл атындағы
№120 орта мектебінің
география пәні мұғалімі.
Қызылорда қаласы.

/// ТАРИХ

Кез келген елдің де, жердің де, тау-тас, өзен-көлдердің де тарихы мен атауы болады. Солардың көпшілігінің атаулары уақыт келе өзгеріп, көмескіленіп ұмытыла бастайды. Сол себепті жер-су атауларының мәні мен мақсатын түсіндіріп, кейінгі ұрпаққа жеткізудің маңызы зор. Қазіргі Мәдениет және Мырзабай ахун ауылының тұрғындары ұзақ жыл пайдаланып, егін егіп, игілігін көріп келген «Торыбай арығы» туралы (кейін «Ермахан каналы» аталып кеткен) және оның қазылу тарихына тоқталғым келеді.

«ТОРЫБАЙ АРЫҒЫ»



Фотом: akorda.kz

Қаншалықты көшпенді халық болдық дегенімізбен ата-бабаларымыз ішінара арық қазып, егін егіп, еңбегінің игілігін көрген. Елдің күн-көріс көзі болған арықтар мен көне жұрттың орнында мүжілген арналар ата-бабаларымыздың бейнеті мен төккен терінің айғағындай. XX ға-сырдың басында алғашқы құрылған серіктестіктер мен артельдер көш-пелі мал шаруашылығымен қоса егін егумен айналысты. Уақыт өте келе егін көлемінің ұлғаюына сай арық қазу жұмыстары жүргізіле бастады. Түстіктегі төменгі елді сумен қамтамасыз ету үшін 1976-1978 жылдары Талдыбаев Жолша-раның басқаруымен Шіркейлі ка-налының аяғын Ақтікен өңіріне дейін тартып, жарма қазу арқасында осы күнгі Мәдениет каналының не-гізі қаланды. 1978 жылы Мәдениет каналына су жығылды. Канал бұдан бұрын қазылған Тайлақ, Жоламан, Қорқытбай арықтарын кесіп өткен еді. Отызыншы жылдардан кейін үкімет колхоздарға астық тұжымын бере бастайды. Астықты колхозшы-лар Қаракеткен станциясынан ар-қап тасиды. 1933 жылы егін шы-ғымы жақсы болып, халық еңбекақыларын алады. Осы кезде ашаршылықтан босып кеткен халық туған жерге көптеп келе бастайды. 1978 жылы ұйымдастырылған «Мә-дениет» (бастығы Әли Байғазиев) ауыл шаруашылығы коммунасы, «Кедей бірлік» (бастығы Жолшара Талдыбаев) ауыл шаруашылығы коммунасының мүшелері саны жыл өткен сайын көбейе берді. Енді бұ-рынғы арықтардың суы жетпей та-рышылық етті. Сондықтан 1935 жылы

Мәдениет және 1 Май ауылдық со-веттерінің қамтуындағы колхоздар «Майжарма» каналын қазып тыңға құлатты. Сол жылы бидай бітік шы-ғып, мемлекетке астық тапсырылды.

1939 жылы Мәдениет совхозы-ның территориясында 4 колхоз құ-рылды. 1950 жылы колхоздар ірі-лендірілгенде Мәдениет ауыл советіне қарайтын колхоздар «Қа-зақстанның XX жылдығы атындағы колхозға», ал 1 Май ауыл советіне қарайтын «Бірлік», «Қызылдихан» «Қызылжұлдыз», Жамбыл колхоз-дары Жамбыл атындағы колхозға біріктірілді. 1969 жылы Жамбыл атындағы колхоз Қазақстанның XX жылдағы атындағы колхозбен қо-сылып, Мәдениет совхозы атанды. Еліміз егемендік алған тоқсаныншы жылдардан кейін Мәдениет ауылы мен Мырзабай ахун ауылы екі ауыл-дық округ болып бөлініп, жұмыс жасап келеді.

Сонымен суармалы егіншіліктің артықшылығына көзі жеткен «Жың-ғылды ой» колхозында тұратын То-рыбай ағайындарда отызыншы жылдардың екінші жартысына та-ман, Майжармадан саға алып, арық қазуға кіріседі. Бұл арықты қазуға жасы үлкен, өмірлік тәжірибелері мол Мұхтар, Молжан секілді ақ-сақалдар басшылық жасайды. Ке-некөз қариялардың айтуынша, То-рыбай арығын қазуға еңбектеген бааладан еңкейген кәріге дейін қаты-сып, үлкен ұйымшылдықпен атса-лысады. Ол кезде жер қазатын те-хникалар жоқтың қасы. Арық қазу жұмыстары қол күшімен, қолдан соғылған кетпен, сырықпен атқары-лады. 1930 жылға дейін совет өкі-

меті дер кезінде шара қабылдап, ка-нал қазушыларға еңбекақысын сол кезде әлі конпескеленбеген байлар төлеп келген.

Бірақ «Торыбай арығын» қазған-дар еңбекақысына төленетін қаржы бола қоймады. Десе де Торыбай ағай-ындар да түйе, өгіздері бар ба-қауатты еді. Оның үстіне 1 Май ауыл советінен арық қазушылардың ең-бегіне қарап белгіленген мөлшерде бидай, тары беріліп келгені айты-лады. Ел арасында «Жұмыла көтер-ген жүк жеңіл» демей ме, Торыбай тынымсыз еңбек пен ауызбіршілік-тің арқасында қазылып болған. То-рыбай арығы Мәдениет ауылының түстік бетінен «Қарай» деген жерге, одан әрі «Шойбасқа» дейін жеткі-зілген көрінеді. Майжармадан саға алып, қол күшімен қазылған кана-лдың ұзындығы 10-15 шақырымдай болады.

1988 жылы Қарақалпақстанның Бейруни ауданына қарайтын Өзбек-станның қырық жылдығы атындағы совхоздағы ағайындарға қылдырып барғанымда Жалағаш ауданы Мә-дениет совхозының онтүстігінде «Қарай» деген жерде «Жыңғылды ай» колхозына үш жыл (1938-1941 жыл) қатарынан төраға болып бас-шылық жасаған алғашқы әйел Қуан-ова Шарипа апаға арнайы сөлем беріп, әнгімелескен едім.

«Егін егіп күн көру үшін колхоз тұрғындары жұдырықтай жұмылып «Торыбай арығын» қазып бітіргенін білемін. Колхозда 75 қожалық бол-ды. Ол кезде қазіргідей техника жоқ. Жұмыс қолмен атқарылады, күш-көлігіміз түйе мен биелер бола-тын. Қар кетіп, жер жібісімен ауыл болып егіске шығамыз. Арықтың екі бетіне орналасқан бидай, жүгері, үпілмәлік, қауын-қарбыз жылда бі-тік шығады. Жылда жоспар орында-лады. Жиын-терін аяқталған соң әр колхозшының еңбекақысына бес ке-лден бидай-жүгері берілетін» деп еске алып еді Шәрипа апам.

Қазіргі Мәдениет және Мырза-бай ахун ауылының ардагер ақса-қалдары жетпіс-сексенінші жылда-ры «Торыбай арығы» арқылы күріш егіп, мол өнім алғандарын әлі күнге дейін әңгімелеп айтып жүр. Демек, аталған екі ауылдың дихандары осы канал бойына күріш, көкөніс, бақша егіп, елу жыл игілігін көріп келген десек қателеспейміз. Бірақ қазір «Торыбай каналының» атауы өз-герген. Қай жылы екені белгісіз, ша-мамен сексенінші жылдары қартаға «Ермахан каналы» болып жазылып кеткен. Мұны Мәдениет пен Мыр-забай ахун ауылындағы көзі тірі куәгер ел ағалары жақсы біледі. Об-лыстық архивте, аудандық газет ма-териалдарында да кезінде «Торыбай арығы» арқылы егін егілгені жайын-да жазылған мәліметтер бар. Әрине, өткенді қозғап, каналдың атауын қайтып алуға әрекет жасап, айты-судан аулақпыз. Десек те айлап қа-зылған каналға атсалысқан ата-ба-баларымыздың сіңірген адал еңбек, маңдай тері бар. Жылдар өткен са-йын көміліп, көмескілене бастаған каналдың ізінде елі мен жерін, ұр-пағының болашағын ойлаған сол бабаларымыздың қалдырған қол-танбасы жатыр. Бүгінгі ұрпақ жаны-лыспас үшін тарих бұрмаланбай, ақиқат айтылуы тиіс. Сондықтан көпшілік біле жүрсін деген ниетпен «Торыбай арығының» қазылу мақ-саты мен тарихын жазып қалдыруды жөн көрдік.

Серік БЕРТАЕВ,
ардагер-журналист



Фотом: akorda.kz

КӨҢІЛДЕН КӨШПЕС АЗАМАТ

Ұялы телефон безек қағып қоя берді. – Алло!

– Амансыз ба, мен марқұм Лескен до-сынның қосағы Өміркүлмін ғой. Жан-жарымнан айырылғалы 20 жыл өте шы-ғыпты. Өттен, бар-жоғы 57 жасында бұл өмірден мезгілсіз кетті ғой. Атам қазақ: «Тау алыстаған сайын биіктей түседі» деп бекер айтпаған екен. Арамыздан кет-се де көңілдегі сағыныш басылмайды. Оның рухын қайта тірілтіп, еске алу рәсімін өткізіп, Құран бағыштамақпыз. Айтапыз, Лескен туралы жақсы білесіз ғой, көңілге түйгендеріңізді еске алып, оқырмандарға олжа етсеңіз...

Өміркүлдің осы бір сағынышты өті-ніші сонау бір жылдарды көз алдыма көл-бендей ала келді. Бұл өмірдегі шым-шы-тырық тірліктің сан тарау сұрлеулерінде алас-күлес атқа мініп, ағындап жүргенде талай жандармен жолың түйіседі. Осы аралықта айналандығыларды талғам тара-зысына салып, арқасы қорған ағаларды ардақтап, ізеті бөлек інілердің ілтипатына бөлесің. Иә, төрге шыкса төбедей, тө-беге шыкса төредей, сан алуан басшы-лықта болса да мадақ пен мансап қумай, елінің жігері, қоғамның тірегі болған ар-дақты азаматтың бірі де бірегейі Бекетов Лескен еді.

Мен онымен сонау тоқсаныншы жыл-дары танысып, араласып, бұл өмірден мезгілсіз өткенше сыйлас та сырлас бол-ғанмын. Ой, заман-ай, оның қашанда қа-рапайым қалпынан айнымайтын адами қасиетін, бойындағы кісілік пен кішілік болмысын көргенде марқайып жүретіңіз. Содан да сабырлық пен сыпайылықты серік етіп, өмірден өтсе де артында өш-пестей із қалдырған ардақты азаматпен дос болғанымды мақтаныш етемін.

«Жаксы адам – елдің ырысы, жаксы жер – жанның тынысы» деген Лескен шынында да жаксы адам еді.

Ол жастайынан жақсыдан үйренді, жаманнан жиренді. «Көре-көре көсем бо-ларсың, сөйлей-сөйлей шешен боларсың» дегендей, парасат пайымы биік азамат болып қалыптасты.

Лескен Бекетов 1949 жылдың маусым айында Қазалы ауданында өмірге келген. Туып-өскен жерінде орта мектепті ой-дағыдай бітіріп, Тараз қаласындағы жеңіл тамақ өнеркәсібі технологиялық институтынан дәріс алып, еңбек жолын 1973 жылы Қызылорда қаласындағы ас-тық өнімдері комбинатында бастайды. Осында жүріп өзін жаксы қырынан көрсетіп элеватор бастығы, комбинаттың бас инженері қызметтеріне жоғарылайды. Кезінде бұл өндіріс орнын «күріш за-уыты» атайтын.

Лескен қызмет еткен жылдары ком-бинат даңқы республика көлемінде дү-рілдеп тұрған шақ еді. 700-ден астам адам еңбек ететін. Әрқайсысы кішігірім зауытқа татитын бірнеше цехтар мен қосалық шаруашылықтар жауапкершілігі бас инженердің мойнына жүктелетін. Элеватор – астық өнімдері комбинатының жүрегі, тыныс-тіршіліктің өзегі болатын. Вагон-вагон күріш салысы комбинатқа ағылып жататын. Осы істің басы-қасында күн күлкіні, түн ұйқыны қойып Лескен жүретін. Жанаушылдыққа жаны құмар бас инженер әлеуметтік-тұрмыстық саланы жаңа деңгейге көтерді.

Қай қызметте болмасын өзінің іскер-лігімен, талапшыл да талғампаздығымен көзге түскен ол 1990 жылы кезінде «мен мұндайлар» тұрған Арал аудандық астық өнімдерін тарату базасының директоры қызметіне тағайындалады. Оның осында жүргенде ұйымдастырушылық қабілеті мен іскерлік таланты ерекше байқалды. Шынында да, Лескен осы қызметке кі-ріскен аз уақыттан кейін-ақ бұған дейін басшылар жиі ауысып, жолы болмай тоқырап келген өндіріс орнының жаны кіріп жүре берді. База жұмысшылары мен қызметкерлері бірнеше ауысымда жұмыс істеп, еңбек көрігін қыздыра түсті. Аудан халқының арзан үн мен мал жеміне қарық болғанына мен куәмін. Өндіріс техно-логиясын толық меңгерген білікті басшы өнім өндіру мәселесін бас жоспарға қоя отырып, еңбеккерлердің тұрмыс-тірші-ліктері мен демалыстарын да ұтымды ұйымдастыра білді. Мекеме ауласы қо-қыстан тазартылып, үгіт-насихатқа ар-налған көрнекіліктер түгелдей дерлік жа-нартылды. Жұмысшылар үшін демалыс бөлмесі мен дүкен ашылды. Осындай жетістіктерімен комбинат облыс, респуб-лика бойынша тағам өнімдері көрмесінде бас бәйгені еншілеп жүрді.

Еліміз тәуелсіздік алғаннан кейін бас-қару жүйесінде қайта құрылым басталды. Өндіріс орындары мен шаруашылықтар-

ды «пысықайлар» жекешелендіріп ала бастады. Сонда Арал аудандық астық өнімдерін тарату базасын жекешелендіріп алу-дан Лескеннің: «ел-халықтың несібө-сін қара басымның құлқынына алуға азаматтық арым жібермейді» деп бас тарт-қаны бар. Қаншама жыл басшылық қызметте жүрсе де дүние-мүлік жинаған-нан гөрі дастарқан жайғанды жақсы кө-руші еді. Ол да бір Құдайдың берген мі-незі шығар, үйінен қонақтар арылмайтын Лескеннің сол ақ дастарқанын Өміркүлі әлі күнге жаюмен отыр.

Жоғарыдағылардың назарына іліккен азамат Арал ауданы әкімінің орынбасары қызметіне тағайындалды. Шыны керек, ол бұл қызметті аса қалаған жоқ, содан болар өз еркімен бас тартқан еді.

– Ереке, әкімшіліктің ісі менің қолым емес екен, қойғым бар. Өйткені, мен саясаткер емеспін, күнде жиналыс, кабинет-тен де шықпайсың, ал мен болсам өнді-ріске кеткім бар, – деген еді бір кездескенде.

Аудан әкімдігінде бар-жоғы үш-төрт айдан кейін «Аралтұз» комбинатының директоры қызметіне барды. Бұл 1999 жыл еді. Осылайша оның басшылық еткен жылдары нарық ықтан басып, таршылық пен тапшылық етектен тартып, ел еңсесін көтеруге мүмкіндік таппай тұрған қиын да күрделі кезеңмен тұспа-тұс келді. «Аралтұз» комбинатында вице-президент қызметінде жүріп, тұз байыту фабрикасының шаңырағын кө-терді. Комбинат өнімдері жарнамаланып, Ресей, Украина, Белоруссия, Өзбекстан мен Қырғызстан қалаларында болып, йодталған сапалы тұздың таралу ауқы-мын кеңейтуге өзіндік үлес қосты. Ол аудан басшыларымен бірге жұмыссыздық салдарынан шырқау шегіне жетіп тұрған әлеуметтік шиеленісті бейбіт жолмен ше-шуге бір кісідей атсалысты.

Ол бірде көлік апатына ұшырады, өмір мен өлім арпалысына түсті. Бірақ мойыған жоқ, қызметінен кеткен жоқ. Өкінішке орай, асқынған ауру алмай қой-мады.

Лескен қысқа ғұмырында үлкен іс тындырды. Өзі қызмет істеген мекеме-лерде ісі мен өшпестей ізі қалды. «Бақыт қонса, басшы болу оңай, ал азамат болу қиын» деген қағида бар. Айтса айтқандай, кандай да бір басшылықта болмасын дан-дайсуды, «мен-мен» деп кеуде соғып, кө-кірегің керуді білген емес. Арғымаққа міндім деп жасампаз жолдан қия басқан жоқ.

Бір құптарлығы, ол марапат пен ман-сапты ұната қоймайтын. «Басты марапа-тым – халық алғысы» деуші еді. Мемле-кеттік мерекелік медальдар мен республикалық, облыстық басқару орган-дарының «Құрмет грамоталары», «Алғыс хаттарымен» марапатталды.

Жақсы адамның атын шығаратын оның дара тұлғалық бітім-болмысы ғана емес, оның бабын келтіретін, асыл қасиеттерін ардақтай білетін қосағы емес пе?! Лескенімен жарасып, шаңырақ кө-терген Өміркүл онымен бірге ауырғанын көзіміз көрді. Жан-жарының жол апа-тынан алған жарасы Өміркүлдің де жү-регіне жара салған. Бірақ мойыған жоқ, көп әйелдердің қолынан келмейтін іс атқара білді. Шаңырақтарын шайқалтпай өмірге бес қыз, бір ұл әкелді. Қыздарын қияға, ұлын ұяға қондырып, немерелер қызығына кенелген жағдайы бар.

Өнегелі отбасының үлкені Жанар Астанада қаржыгер қызметінде болса, Айгүл ҚР Президенті телерадиокөшені-нде жауапты қызмет атқарады. Ал Бибіну-р заңгер. Өйгерім – Ұлттық банкте бас маман. Салтанат өз кәсібін нәсіп етсе, шаңырақтың кенжесі Санжар Қызылор-дадағы «Фридом қаржы брокер» мекеме-сінің басшысы.

Әңгіме үстінде Өміркүл жеңгеміз: – Көзі тірісінде Лескенге бір құрдасы: «Сен талай қызметте жүрдің, бірақ дүние-мүлік жинамаған екенсің» дегенде, ол: «Мен дүние-мүлік емес, ел-халық алғы-сын алып жүрмін» дегені әлі есімде. Әкелері айтқандай, менің ұл-қыздарым да дүние-мүлікке қызығар жандар емес. «Әке көрген оқ жонар, шеше көрген тон пішер» деген сол шығар. Осыған шүкір-шілік жасаймын, – дегені бар.

Лескен бізден алыстаса да аласар-майды, қайта ұрпақтар сабақтастығымен биіктей бермек.

Еркін ӘБІЛ,
Қазақстан Жазушылар
одағының мүшесі,
Арал ауданының
құрметті азаматы

